

# RUKU

## 7

### *Ehaara nahenki vainkiaa*

<sup>11</sup> Naankiara amparaiqasa Isuva vo vakusa via auku Neni vakusaini yumanka via vainkinavuvaka airi vaiinki nahenkivaka via vakamase vuvo <sup>12</sup> Isuva vi vakusaa qentiana ou nteo kavomanka vakusaqinkai vaiinki nahenki quku vu vaiinkia kainta vae via quntaeave kivase anua. Quku vu vaiinkiva ehaara nahenki maagu vaumanka airi vaiinki nahenki vi nahenkia vakamase anuvo <sup>13</sup> Isuva vi nahenkia kaveo munkusaqinkaio umpo ise kiva amikeo viaa kihao, Sa iqi rakaane, kio. <sup>14</sup> Minki kivaseo ou kainta ukuvaromanka vaiinkinavu kainta ani varosa himpi vauvo Isuva kihao, Qaraasa vaiinkio, ke ariara himpuane ki uo, kuvo <sup>15</sup> quku vu vaiinkiva himpio vaavi aravio uvavaka kuvo Isuva vi vainkia nai noa amio.

<sup>16</sup> Minkuvo visa aiqava voqamase aaku ikomanka Kotia auku kure reha kiha, Poropeti vaiinki noavano kinavu avukaqi qovarama vio ivo, kinka. Kotiya sa kinavu nai vainkinavuaa kauru seo ivo, kinka...

## 12

<sup>1</sup> ...

### *Kotia aakuqai qekeha variake kua*

<sup>4</sup> O Ki navunaao, ni vaakaqai arusesa sa visa aaku qekaake. Visa ni aruse sa ni maraquavaka ho arusevaave. <sup>5</sup> Ne kararae qekeha vaivaave?

Saiqe ke ni kiva nimiaie. Ne Kotia aaku qekeha variake. Viva mpeqavano vaihao vaiinki aruseo viaqaankaio homa via gukuvisa vinaini agu saaiavama vaio ivo. Eo, ke niarama ki uo ne Kotia aaku qekehama variake...

*Airi aiaia vakako vaiinkiaa kuama*

<sup>15</sup> ...Isuva aiqava vaiinki nahenki kiva nimio, Ne rauriha variake. Ne airi aiaiave airi munimave vaea viaa noaiqaase iiha vaiqi vivoave. Ne kiha airi aiaia vakeha homa vaiqi viaave kivoave. Sa aiaivano ni saihaqia ne soqemase vaiqi viavaave, kio.

<sup>16</sup> Isuva minki kivaseo viva uva uantaseo kiva nimio, Vaiinkivano airi aiaia vakova ntara ukukeo airi ntara qantu vaeo <sup>17</sup> nai kivaseo iio, Ke maa ntaraa ka naavuaqie vakaraave? Aiqaava ki naavuqi ntaravano mpiqama vio ivo, kio. <sup>18</sup> Minki kivaseo viva kihao, Saiqe ke aiqava naavu rampaise qaiqaa noa naavu vo naavu vo naavu saqase viaqi ntaravaka aiaivaka vakaae, kio. <sup>19</sup> Ke vi saiqaa vuu kaiqase minkima kiaa, Ke soqemama vai uo. Airi ntara airi aiaia vaimanka ke airi ihi voka vaiqi viha maa ntaraavaka namaivaka namaqi viha soqemase vaiaave, kio. <sup>20</sup> Vi vaiinkiva minki kuvo Kotiva via kiva amio, Sa ai avu aako vaivave. Maa entaa entaqi ae quku vinaave. Ae quku viao vovano ai aiaia kenka ukukaeave kiana aiaiaa varaanaove, kuave, kio.

<sup>21</sup> Isuva minki kiva nimi kaiqaseo viva kihao, Vaiinkivano aiaiaaqai iihao aiqava aiaia uikareo vakaiava vaiio Kotiva vi vaiinkiaa kihao, Ai

aiaia qumina ahasave. Ke kavauaa ae vehi vai-inkiqaima variaao. Ae qumina quku vinaave, kianaove, kio...

## 15

### *Via maaqu raumpiima vuua kua.*

<sup>11</sup> Iсуva minki kivaseo viva kihao, Vaiinki vovano qorainki vainki kaaraqanta vakakovoma <sup>12</sup> via vainki naankiaraihainaava vaihao nai goaa kihao, Naankiara ki kimieva kinaa aiaia vakeqai kimiane, kio. Kuvo via qova aiaia rairaseo nai maaqukanta voavaka voavaka nimuvo <sup>13</sup> via maaquvano naankiaraihainaava amparaiqaqai vaio nai aiaiaqo soqaa aukuseo munima vaeo niara maaga vio ou mini vaihao manta vaiinki hampaka vaihao <sup>14</sup> munima vare vua vuu kaiqa seo.

Vuu kaiqa sovo viaqaankaio sa ntaravaka vau entava ani ntovo <sup>15</sup> viva vehi vaihao ou vi vakaqaankainaa vaiinki hampaka saiqa vaeo. Saiqa vare vauvo ou quara ntara amiane kuvo <sup>16</sup> viva quara ntara nimihao kio, Ise, kevaka quara ntara viki nimunaa naakaave kuvo ntara amiaiava sa vauvo <sup>17</sup> narara vaihao uvo aako kenko kuvo iivuvo viva naiqai minki kivaseo iio.

Ki qoa saiqa vare vaia vainkisa airi vaiavao ntara airiqimanka neha vaiamanka ke maini vaiha narara vai uo. <sup>18</sup> Saiqe ke himpi kenka qova inanaini anirante vuae. Ke ou nte kenka goaa minki kieave. Ki qo, ke Kotiavaka aivaka manta saiqa vaa nimike uo. <sup>19</sup> Ke via saara sa ai vainki soqesa ho vaiaave. Ae ki amparaiqama saiaqe ke

ai saiqa vainikiqai vaiae. Ke minki kivase kieave, kio.

<sup>20</sup> Minki kivaseo himpio nai qova unaini anio. Nai qoa naavu aumanko anuvo via qova vukua niaraihaio via kaveo quaha seo santeo ou nai maaqu ravaaqau seo susugehao vauvo via maaquvano kihao, <sup>21</sup> Ki qo, ke Kotiavaka aivaka manta saiqa vaa nimike uo. Ke via saara sa ai vainki soqesa ho vaiaave, kio.

<sup>22</sup> Kuvo via qova nai saiqa vainki kiva nimio, Sante ne ou ukavaaqa soqeaqaima vara vii amikaake. Saankava irara vara vii usu amikaake. <sup>23</sup> Purimakaua naaki soqea aruse nunkaake. Vake maasa viaa quahama amikaeama ivo. <sup>24</sup> Ki maaquvano quku vivo kuoma qaqi aniteo ivo. Ki maaquvano raumpiima vivo kuaoma qovarama vio ivo, kio. Minki kivaseo nai maaqu quahama amikeo ntara varaseo kavaaruqama amikeo.

<sup>25</sup> Kavaaruqama amike vauvo via vasaava saiqaqinkaio naavu aumanko aniteo iuvo <sup>26</sup> ihi nte vauvo viva nai qoa saiqa vainki vo irovo viva minkima kio, <sup>27</sup> Ai qakavano vekaihaio anintaivo ai qova viaa quahehao purimakaua naaki soqea aruseo nunka amikeo ivo. Ai qaka soqema seo nai vikeo quahehaoma minkio ivo, kio.

<sup>28</sup> Minki kuvo via vasaaa arara ikovo komaseo kihao, Sa ke naavuqi vieama ivo, kivaseo vahaqaini vauvo via qova veva nteo aarovo viva minkima kio, <sup>29</sup> Ke airi ihi varaqi vihama ai saiqa vainki voqaantemase ai saiqa vaehama sa ke vo entavaka ai no antua viai vai uo. Ke kenka konti quahama nimikaea kuaa ae sama mimi naaki vonku ruquku kimia iarao. <sup>30</sup> Maava ai

maaquvano hampi naio ni vai nahenkiaqaa ae iana ahasaa vaeo vuu kaiqa seo anivaama purimakaua naaki soqea qumina ruquku amia iarao, kio.

<sup>31</sup> Minki kuvo via qova aqao kio, Ki maaquvauvao, ae vo enta vo enta ki vakamasea vaiavave. Ke una ahasaa aiqava aiaia kenkakanta unaave.

<sup>32</sup> Ai qakavano quku vivo kuoma qaqi aninteo ivo. Viva raumpiima vio ivo kuoma qaqi qovaama vio ivo. Minkiaa ki kenavu vake via quahama amikaeave, kuave, kio. Isuva kuama.

## 16

### *Rasarusiaa kua*

<sup>19</sup> Isuva minki kivaseo viva kiva nimio, Vaiinki vovano airi aiaia vakova soqe ukavaaqaqai nonkuseo vo enta vo enta hiasaa u ntaraaqai nehao vauave.

<sup>20</sup> Viva vi ntaraaqai neha vaumanka vaiinki vo via auku Rasarusia vika vae vuu airi aiaia vako vaiinkia naavu qentiana sovo vaua. Vi vaiinkiva sa aiaivaka vakova vehi vaiinkivano vauvo numuaravanoqai aiqava via vaakaqaa ike vauvo

<sup>21</sup> vaihao viva airi aiaia vako vaiinkiva ntara nehao viki aqusoaa viaqai nunku naeva vaua. Mini vauvo vairivano vikare aikare ihao via numuara mpui ne vaua.

<sup>22</sup> Sa aiaia vako vaiinkiva quku vumanka naauaihainaasa via vika vare vuu Avarahaava nai saivaqaa vaunaini vuu soa.

<sup>23</sup> Vuu sovo airi aiaia vako vaiinkiva vivavaka vaio quku vuvu vakaqi quntama kovo viva quku vuasa vaianaini vaihao ankua ntihao vaio. Mini

vaihao viva vuuvi kavovo Rasarusiva Avarahaas-  
anti quahehao niaraini vaua.

<sup>24</sup> Vauvo viva Avarahaaa aareo kihao, Avara-  
haao, ki qo, kiriara umpo ise kiva kimikaane.  
Ae Rasarusia akikaio viva nai vuqa ou namaiqia  
vaavi quntama vaeo munku ki maaqiiqaa vakaiiao  
nupima kimikaaie, kio. Ke noa iha ikaiiaqi vaiha  
ankua ntiha vai uo, kio.

<sup>25</sup> Viva minki kuvo Avarahaava aqao kio, Ki  
vainkivauvo, ae iriane. Ae haau qaqi vauna entaa  
soqe ahasa vakoao Rasarusiva manta ahasaqai  
vakoave. Vake viva maini vaihao quahehao  
vaivaa ae mini ankua ntihaa vaiarao. <sup>26</sup> Ae  
qaiqaavaka ii vaiage ke voqa ai kiva amiae. Ke  
vaunaa ae vaianaa avukana onkai noama vaio  
ivo. Maihaio vuantove vihaio aniantoave kio  
onkai noama avukana vakaiave, kio.

<sup>27</sup> Avarahaava minki kuvo vi vaiinkiva kihao,  
Umpo, ki qo, ke ariara umpo ise ki uo. Rasaru-  
sia akikaiao viva ki qoa naavuqi ou nteo <sup>28</sup> ki  
qaka vasausa sauqu hiniunavu vaisa kiva nimi-  
aie. Visavaka maini aiha vinanaini anivoave, kio.

<sup>29</sup> Minki kuvo Avarahaava aqao, kio. Mose-  
vavaka poropeti vaiinkinavuvaka qara ntuva ko  
uvava vaiove. Visa vi uvaa homa iivaave, kio.

<sup>30</sup> Kuvo qaqi vau entaa airi aiiaia vako vaiinkiva  
kihao, Save, ki qo, Avarahaao, quku viava aniran-  
teo vuu kiva nimia visa via uva iihama manta aara  
qaqia sevaave, kio.

<sup>31</sup> Minki kuvo Avarahaava aqao kio. Visa Mosea  
uvavaka poropeti vaiinki uvavaka sa iivea visa  
quku viava aniranteo vuu kina uvaavaka sa ho  
iivaave, kuave, kio. Isuva minki kuama.

## 22

### *Isua ravaaqau soa*

<sup>47</sup> Isuva mini vaihao qaqi ki vaumanka vaiinki airi vaiinkinavu anintoa. Isua vainki 12 navuqinkaio Iuntaasiva airi vaiinki ntika vaeo viva naane visa avuni anio Isuva vaunaini aninteo Isua moqa saeva auki vauvo <sup>48</sup> Isuva kihao, Iuntaasio, ae ki moqa sehaae ki vakaini vakakai vainkisa navukaasa nivuqaa ki qovarama senaave? kio.

<sup>49</sup> Isuva minki kumanka via vainkinavu via vakamase vause kavomanka visa Isua ravaaqau saesa auki vaumanka vinavusa Isuaa kiha, Noavauvo, kenavu sopiqoe visa keqa saraave? kinka. <sup>50</sup> Kivaseo vovano Kotia saiqa vaa amike vau vaiinkisa visa avuniaa saiqa vainki vo keqaseo via aako keqa aqu sovo hiqintuvo Isuva aqao kio hove kio. <sup>51</sup> Kivaseo vi vaiinkia aakoqaa nai sauqu vakovo qaiqaa kavanta vua.

<sup>52</sup> Kotia saiqa vaa amike vau vaiinkisa visa noanavuvaka, Kotia naavuqaa raqisi vau porisisa opisaaravaka, noa vaiinki vonavuvaka, visa Isua ravaaqau saesa anusaa Isuva kihao, Ne kamaania vakamase iqosa raquaina vaiinkia voqaama ravaaqau saesae sopi saavu vare aniavo? <sup>53</sup> Ke ni hampaka vo enta vo enta Kotia naavuqi vaiqi vi vauamanka ne sa ki ravaaqau saarave. Ho vake maa entaa ni entama vaio ivo. Vake sonkiai qi vaia ahasava mpeqaiqianaove, kio.

## 23

### *Hini sakaiqaa aruso vaiinkiva uva kua*

<sup>39</sup> Manta vaiinki vovano hini sakaiqaa arusova vivavaka Isua manta uva kiva amihao kihao,

Quqaae ae mesaia vaiinkivano variarao? Ae ne-navano kikantavaka saihaqiane, kio. <sup>40</sup> Minki kuvo manta vaiinki vovano aqao kio, Sae ae Kotia aaku qekehaa variarao? Visa kikanta aanantamase viavaka arusaavo. <sup>41</sup> Visa homa kikanta arusevaave. Visa kikanta manta saiqa saara kikanta arusaavo. Vi vaiinkiva sa manta saiqa varaivave, kio.

<sup>42</sup> Minki kivaseo viva Isuaa kihao, Isuo, ai noaiqama saaina entaa kiriarama irikaane, kio. <sup>43</sup> Minki kuvo Isuva kihao, Ke ai kiva amiaiama iriane. Vake ae ki vakamaseama soqe vakusaini vainaave, kio.

### *Isuva quku vua*

<sup>44</sup> Minkuvo suai qiakaqaa uu ntovo viaqaankaio sonkiaiqama vuvo sa suai ikovo sonkiaqai aruqio vuvo suai vikiniqamavio 3 kiroki quvo qaiqaa aakikoa. <sup>45</sup> Ierusalemi vakusaini Kotia naavuqi saankusa voqaama noa kavuna hiikova avukaqaa nai nahaqu vuvo <sup>46</sup> Isuva noaiqaaseo oi oi kihao, Ki go, ki maraqua varaane, kio. Minki kivaseo viva quku vio. <sup>47</sup> Isuva quku vuvo sontiaqaa raqisi vau vaiinkiva Isuva minkua kaveo Kotia auku kure ra seo kihao, Quqaama maa vaiinkiva avuqavu ni vai vaiinkivave, kio.

<sup>48</sup> Minki kumanka vi saiqaa kavaesa ruvaantuma vusa visa vaiha kavamase viaqaankai visa nai maaqaini anirante vihama munkusa mantaiqumanka nai mimia ruquku seha vuama. <sup>49</sup> Visa vumanka Isua vaiinki nahenkivaka, nahenki vonavu Kariri vakaihai via vakaqi nusavaka, visa niara ntaka vaiha vi saiqaa kave vaua...



## 24

### *Emeasi vakusaini ni vau vaiinkikantaa kua*

<sup>13</sup> Vi entaaqaa Isua vainki kaaraqanta vo vakusa Emeasi vakusaini viesa vua. (Urara vaivo Kainantu vaivo via voqaama Ierusalemi vauvo Emeasi vakusa vaua.) <sup>14</sup> Vikanta aarana viha Isua aruso uvaa kivaqi vi. <sup>15</sup> Vikanta kivaqi vuvo Isuva nai aninteo vikanta vakamaseo ou vumanka <sup>16</sup> vikanta via kaveha sa via uqaqamase kavarai vo vaiinkivanove kuvo <sup>17</sup> Isuva vikantaa kihao, Nekanta aarana aniha nana uvae nai kiva ami nai kiva ami ani vaiavo? kio.

Minki kumanka vikanta ani viaqaa himpике munkusavano mantaiqumanka <sup>18</sup> vovano Siriopasiva Isua ireo, Maa entaa airi vaiinkinavu ani Ierusalemi variavaa ae vohaiqavanoqae kuvana qovaraiqi uvaa sae iriarao? kio. <sup>19</sup> Minki kuvo Isuva nana uvave kumanka vikanta kiha, Isuva Naasaretihaana uvave. Vi vaiinkiva poropeti vaiinkivano vaihao Kotia avuqaavaka vaiinki nahenki nivuqaavaka noa saiqa vaehao soqe uva kio ivo. <sup>20</sup> Viva vaimanka Kotia saiqa vaa amike vaia vaiinkisa visa noa vaiinkinavuvaka, kinavuqaa raqisi vaiasavaka, visa via amiavo viva via arusaake kimanka via sakaiqaa pirimaqo arusaavo. <sup>21</sup> Kenavu haau vi vankiaa Kotiva via akikaivo viva vo vakanaasa aakara seo kinavu Isarai vankiqaa raqisiaiavave kunaave. Uva vovakama vaio ivo. Via arusaavo vake kaaramo enta aikareo ivo. <sup>22</sup> Vake kekanta nahenkinavu kia uvaa ii rankuma vi uo. Vinavusa vaasa qararaa via quntama kaaraqo ou nte sa via vaaka kavaavo. <sup>23</sup> Vinavusa anirante vuu kiva nimiha, Nauaihainaasa kinavuaa viva qaqima vaio

ivo kiavo, kinka. <sup>24</sup> Vinavusa minki kiamanka kinavuqinkai hini vaiinkinavu via quntama kaaraqi ou vi ou kavaavo nahenkivano ki uvaa vivauma vaimanka via vaakavaka sa kavaave, kinka.

<sup>25</sup> Vikanta minki kuvo Isuva vikanta kiva nimio, Nikanta avu aakovaka sama vaio ivo. Haau poropetinavu kiva ko uvaa nekanta vi uvaa quqaave kiakaa vaimanka nekanta qasomase vi uvaa ii vaiavo. <sup>26</sup> Nekanta sae iriavo? Kotiva akikaaiia vaiinkiva mesaia vaiinkivano aihayina ahasaa vaiqio vio viaqaankaio noaiqama vio mpeqa vaiinkivano vaianaove, kio.

<sup>27</sup> Minki kivaseo Isuva mesaia vaiinkiaa Kotia vukaqi gara ntuva ko uvaa vikanta kiva nimieva hoqareo Mosea vukaqinkaio kiva nimiqio vio poropetinavu vukaqinkaio kiva nimiqio vua.

<sup>28</sup> Minki ki vauvo vikanta viesu u vakusava aumanko vauvo Isuva aarana qaqi vieva voqaama auki vauvo <sup>29</sup> vikanta aqao ki, Amparaiqaqaa entievave. Qaqa sea kikanta vakamasea vaikaane kuvo vikanta vakamaseo vaieva naavuqi vio. <sup>30</sup> Viva viaqi vaihao ntara kaintaqaqa vikanta vakamaseo oquvio Kotiaa soqema iarao kivaseo mpareti ntara nkuiseo rairaseo nimumanka <sup>31</sup> vikanta avu aako kenko kuvo iivumanka vikanta via uqauqamase kave. Vikanta via uqauqamase kavovo Isuva vikanta nivuqaankaio uantavio sa vaio. <sup>32</sup> Isuva uantavio sa vaumanka vikanta nai kiva ami nai kiva amihakanta, Viva aarana anihao Kotia vukaqinkainaa uva kikanta kiva kimi vaivo quqaama kikanta munkusaqinkaio soqema vio ivo, kinka.

<sup>33</sup> Minki kivase vikanta vaasa himpikanta anirante Ierusalemni ou Isua vainki 11 navu rantase kavomanka vinavusa vo vaiinkinavu vakamase ruvaantumavi kiha, <sup>34</sup> Noavano quqaama qaiqaa himpio ivo. Saimoniva vivama kaveo ivo, kumanka <sup>35</sup> vikantavaka aaraini niha kavooa visa kiva nimi. Vikanta kiha, Viva mpareti ntara nkui saimanka viaqaankai kenka noa vaiinki sankunkase kave uo, kinka.

*Isuva nai vainki nivuqaa qovaraiqama vua*

<sup>36</sup> Vikanta uva visa kiva nimi vauvo vakeni noavano vivama qovaraiqama vio visa kakaqaa himpikao vaihao kihao, Ni munkusaqinkai qihaasi vaia variake, kio. <sup>37</sup> Minki kumanka visa voqamase qekeha vaanavano qovarama vivo kuvo <sup>38</sup> Isuva visaa kihao, Ne nankihae qeke vaiavo? Ne nankihae kiriara kaara aako vake ii vaiavo? <sup>39</sup> Ki sauqu aiq uvaake. Ke visama ivo. Ki aukeha kavaake. Ke vaiinkima vai uo. Sa vaanavano ki aananteo makivaka vuhaavaka vaiavaave, kio.

<sup>40</sup> Minki kivaseo viva nai sauquvaka aiq uvaka numiqomanka <sup>41</sup> visa voqamase quaheha sauqu runkinkii iha kiha, Sa ho viaa quqaave, kiae kuvo Isuva kihao, Ntara naainaa vaio ivo, kumanka <sup>42</sup> hampusa nunkakoa ampara amuvo <sup>43</sup> viva visa nivuqaa vaihao varaseo noa.

<sup>44</sup> Isuva hampusa namaseo visa kiva nimio, Haau ni hampaka vaiha ke maa uvaa ni kiva nimunaave. Kiriara haau Moseva vukaqi qara ntuva ko uvaave, poropeti vaiinkinavu qara ntuva ko uvaave, Saami vukaqi qara ntuva ko uvaave, ke ni kiva nimiha vi uvaa vivauma vianaove kunaave, kio.

<sup>45</sup> Minki kivaseo visa Kotia vukaqi qara ntuva ko uvaa sankunka iriake kio viva vi uvaa vi uvaa kiva nimio kihao, <sup>46</sup> Maa uvaa qara ntuva koave. Mesaia vaiinkiaa viva aihavina ahasaa vaeo yuu quku vio kaaramo enta vaio qaiqaa qaqi himpuanaove. <sup>47</sup> Viaqaankai ne ki saiqaa ki hukuaa iihama vaiinki nahenki kiva nimiqi viha manta aara qaqia saivo Kotiva ne manta saiqa vare uvaa nunka nimikaaie kiake. Vi uvaa kiva nimiqi viha Ierusalemmini naane vi uvaa kiva nimiqi vi viaqaankai vo vakaqaa vo vakaqaa kiva nimiqi vuake. <sup>48</sup> Nenavu nenka avuqo vi ahasaa vi saiqaa kavaama ivo. <sup>49</sup> Ki qova sauqu aiqiqaa aqusehao kenka ni nimieave kiainaa kema via akikaeave. Ne maa vakusaaqi vaiqi vivo naauaihaio viva kuvio niqaa vaihaoma ni mpeqaiqama nimikaaie, kio...

**Isuva Soqe Uva Kuama  
Genesis and the Gospels in the Arau dialect of the  
North Tairora language of Papua New Guinea  
Sampela hap Buk Baibel long tokples Arau long  
Niugini**

copyright © 1986 Wycliffe Bible Translators, Inc.

Language: Arau (North Tairora)

Dialect: Arau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 22 Feb 2024 from source files dated 31 Aug 2023

90947037-585d-5612-873d-36e338f0ae1b